

Oifigeach Eolaíochta um Ullmhacht agus Freagairt Éigeandála

Aonad: Feidhmeanna Sláinte Poiblí
Tagairt: ECDC/FGIV/2023/PHF-SOEPR

Tá iarratais á lorg ar an bpost thuasluaite mar Ghníomhaire ar Conradh sa Lárionad Eorpach um Ghalair a Chosc agus a Rialú (ECDC).

Sainchuntas poist

Tá sé beartaithe ag ECDC beirt a earcú don phróifíl thuasluaite, post fadtéarmach amháin agus post amháin a chlúdaíonn tionscadal EWRS¹. Tá sé beartaithe ag ECDC freisin liosta ionadaithe a bhunú, a fhéadfar a úsáid le haghaidh folúntas sa réimse seo amach anseo.

Ceapfar sealbhóir an phoist chuig rannóg Ullmhachta agus Freagartha Éigeandála agus tuairisceoidh sé/sí don Cheann Rannóige nó do Cheannaire an Ghrúpa.

Beidh sé/sí freagrach as roinnt de na cúraimí seo a leanas ag brath ar an réimse oibre a sannfar dó/di:

- Tacú le Ballstáit AE/LEE agus le tríú tíortha, agus leis an gCoimisiún Eorpach, i ngníomhaíochtaí a bhaineann le hullmhacht agus freagairt éigeandála trí fhianaise eolaíoch a chur ar fáil (e.g. athbhreithnithe litríochta, tuarascálacha teicniúla, treoirdhoiciméid), trí chleachtaí ionsamhlúcháin a dhéanamh, trí athbhreithnithe a dhéanamh le linn gníomhaíochtaí agus ina ndiaidh, trí chuartheanna tíre a thabhairt agus trí pháirt a ghlacadh i ngníomhaíochtaí spriocdhíríte um fhorbairt acmhainne agus trí uirlisí, modheolaíochtaí measúnaithe agus ábhair oiliúna a fhorbairt;
- Tacú le huirlisí eipidéimeolaíocha a fheidhmiú, a chothabháil, a mheas agus a fhorbairt tuilleadh (e.g. bunachair sonraí, pacáistí anailíse agus córais faisnéise sláinte poiblí) le haghaidh ullmhacht agus freagairt éigeandála;
- Rannchuidiú leis an gCóras Luathrabhaidh agus Freagartha (EWRS) a oibriú, a nuashonrú go leanúnach agus a fhorbairt tuilleadh, lena n-áirítear feidhmiúlachtaí breise a sholáthar, teicneolaíochtaí nua-aimseartha a úsáid agus nascáil le córais rabhaidh eile de chuid an Aontais tar éis cur chuige uile-ghuaise agus comhar trasearnálach a éascú;

¹ [EUR-Lex - 32022R2371 - EN - EUR-Lex \(europa.eu\)](#)

- Rannchuidiú le himscrúduithe trasteorann ar ráigeanna agus tacú le táirgeadh tráthúil mearmheasúnuithe riosca nó ráige atá ar ardcháilíocht agus bunaithe ar fhianaise agus aschuir ghaolmhara eile mar fhreagairt ar bhagairtí galar tógálach;
- Páirt a ghlacadh in imscaradh allamuigh chun tacú le misin freagartha i mBallstáit AE/LEE agus i dtríú tíortha, i gcomhar le geallsealbhóirí AE (e.g. DG ECHO agus DG INTPA de chuid an Choimisiúin Eorpaigh) agus le comhpháirtithe nach de chuid an Aontais iad (e.g. EDS, GOARN, agus CDCanna eile);
- Idirchaidreamh a dhéanamh agus comhoibriú go gníomhach le geallsealbhóirí inmheánacha agus seachtracha agus páirt a ghlacadh i líonraí ullmhachta agus freagartha chun comhar ECDC a neartú le Ballstáit AE/LEE agus le tríú tíortha;
- Cur le córas freagartha dualgais agus le córas dualgais 24/7 de chuid ECDC;
- Aon chúraimí eile a bhaineann lena réimse oibre, de réir mar a iarrtar air/uirthi.

Na cáilíochtaí agus an taithí a theastaíonn

A. Ceanglais fhoirmiúla

Chun bheith i d'iarrthóir incháilithe, ní mór duit sraith ceanglas foirmiúil a chomhlíonadh. Is iad seo a leanas na riachtanais atá i gceist:

- Leibhéal oideachais a chomhfhreagraíonn do chúrsa ollscoile críochnaithe trí bliana ar a laghad arna fhianú le dioplóma ²;
- Eolas cruinn ar cheann amháin de theangacha oifigiúla AE agus eolas sásúil ar theanga oifigiúil eile AE sa mhéid is gá chun a dhualgais/a dualgais a chomhlíonadh³;
- A bheith ina náisiúnach de cheann de Bhallstáit den Aontas Eorpach nó de chuid na hIorua, na hÍoslainne nó Lichtinstéin;
- A bheith i dteideal a cheart/a ceart iomlán mar shaoránach⁴;
- Aon oibleagáidí a fhorchuirtear leis na dlíthe is infheidhme maidir le seirbhís mhíleata a bheith comhlíonta aige/aici;
- Na riachtanais charachtair a chomhlíonadh maidir leis na dualgais atá i gceist; agus
- A bheith corpacmhainneach chun na dualgais a bhaineann leis an bpost a chomhlíonadh.

B. Critéir roghnúcháin

Tá **critéir riachtanacha** maidir le taithí ghairmiúil/eolas agus tréithe pearsanta/scileanna idirphearsanta sainaitheanta againn mar chritéir cháilitheacha don phost seo.

Taithí ghairmiúil/eolas:

- Trí bliana de thaithí ghairmiúil ar a laghad, tar éis an dioplóma a bhaint amach, a fuarthas i bpoist atá ábhartha don sainchuntas poist;

2 Ní bhreithneofar ach dioplómaí agus teastais a bronnadh i mBallstáit AE nó lena mbaineann teastais chomhionannais arna n-eisiúint ag údaráis sna Ballstáit sin.

3 I gcás iarrthóirí a bhfuil máthairtheanga acu nach teanga oifigiúil den chuid an Aontais í nó arb é Béarla a máthairtheanga, ní mór dóibh leibhéal an dara teanga a chruthú le teastas (B1 nó níos mó).

4 Sula gceapfar é/í, iarrfar ar an iarrthóir rathúil deimhniú ó na póilíní a chur ar fáil, lena léireofar nach bhfuil aon taifead coiriúil ar bith aige/aici.

- Céim ollscoile i réimse na sláinte poiblí, na heipidéimeolaíochta, na n-eolaíochtaí sláinte, an leighis, na n-eolaíochtaí bithleighis, nó i réimse eile lena mbaineann. De rogha air sin, iarchéim san eipidéimeolaíocht allamuigh fheidhmeach (e.g. EPIET nó a choibhéis amhail clár náisiúnta oiliúna eipidéimeolaíochta allamuigh);
- Taithí chruthaithe ar fhaireachas, ar ullmhacht i gcás éigeandála, ar intleacht eipidéime/ar bhagairtí a bhrath nó ar imscrúdú ar ráigeanna;
- A bheith eolach ar bhunachair sonraí, ar uirlisí eipidéimeolaíochta agus ar phacáistí bogearraí staidrimh agus an cumas a bheith acu obair leo siúd chun faisnéis eipidéimeolaíochta, sonraí faireachais san áireamh, a bhainistiú, a mhalartú agus anailís a dhéanamh uirthi;
- Taithí ar chórais nó ar shásraí luathrabhaidh agus freagartha náisiúnta, réigiúnacha nó áitiúla;
- Ardleibhéal Béarla, idir scríofa agus labhartha.

Tréithe pearsanta/scileanna idirphearsanta:

- Dírithe ar ardchaighdeán a bhaint amach agus ar sheirbhís a chur ar fáil;
- An cumas obair i gcomhar, caidreamh láidir oibre a fhorbairt agus riachtanais na dtíortha agus na ngeallsealbhóirí a thuiscint;
- Dírithe ar thorthaí a bhaint amach agus an cumas gníomhú ar a dtionscnamh féin;
- Dea-scileanna eagrúcháin agus bainistíochta tionscadail agus an cumas oibriú faoi bhrú;
- Dea-scileanna anailíseacha.

Ag brath ar an líon iarratas a gheofar, d'fhéadfadh an coiste roghnúcháin riachtanais níos doichte a chur i bhfeidhm laistigh de na critéir roghnúcháin atá luaite thuas.

Comhdheiseanna

Is fostóir comhdheiseanna é ECDC agus molann sé go láidir do gach iarrthóir a chomhlíonann na critéir incháilitheachta agus roghnúcháin iarratas a dhéanamh, gan aon idirdhealú bunaithe ar fhorais amhail aois, cine, polaitíocht, fealsúnacht nó creideamh, inscne nó gnéaschlaonadh agus beag beann ar mhíchumas.

Ceapachán agus coinníollacha fostaíochta

Ceapfar an sealbhóir poist de réir gearrliosta a mholfaidh an Coiste Roghnúcháin don Stiúrtóir. Is ar an bhfógra folúntais seo a bheidh an moladh ón gCoiste Roghnúcháin bunaithe. Iarrfar ar iarrthóirí trialacha scríofa a dhéanamh. Ba cheart d'iarrthóirí a thabhairt dá n-aire go bhféadfaí an togra a chur ar fáil go poiblí agus nach ionann ainm a bheith ar an ngearrliosta agus duine a earcú. Déanfar an gearrliosta iarrthóirí a ullmhú tar éis nós imeachta roghnúcháin oscailte.

Earcófar an t-iarrthóir a n-éireoidh leis/léi mar ghníomhaire ar conradh, de bhun Airteagal 3a) de Choinníollacha Fostaíochta Sheirbhísigh Eile na gComhphobal Eorpach go ceann tréimhse cúig bliana (infheidhme don phost fadtéarmach agus don phost tionscadail araon). Is féidir an conradh a athnuachan (i gcás an phoist tionscadail, braitheann sé sin ar mhaoiniú an tionscadail). Déanfar an ceapachán chuig **Feidhmghrúpa FGIV**.

Ba cheart d'iarrthóirí a thabhairt dá n-aire go gceanglaítear le rialacháin foirne an Aontais go gcuirfidh gach ball foirne nua tréimhse phromhaidh naoi mí i gcrích go rathúil.

Chun tuilleadh faisnéise a fháil faoi na coinníollacha conarthacha agus oibre, féach Coinníollacha Fostaíochta Sheirbhísigh eile na gComhphobal Eorpach, atá ar fáil ag an nasc seo a leanas:

<https://eur-lex.europa.eu/legal-content/EN/TXT/?uri=CELEX%3A01962R0031-20140501>

Beidh an post lonnaithe i Stócólm, áit a gcuireann an Lárionad a chuid gníomhaíochtaí i gcrích.

Liosta ionadaithe

D'fhéadfadh sé go ndéanfaí liosta ionadaithe a bhunú agus a úsáid chun críche earcaíochta sa chás go dtiocfadh folúntais den chineál céanna chun cinn. Beidh an liosta sin bailí go dtí an 31 Nollaig sa bhliain chéanna ina dtiteann an sprioc-am le haghaidh iarratas. Féadfar síneadh ama a chur leis an tréimhse sin.

Nós imeachta iarratais

Chun iarratas a dhéanamh ar an bhfolúntas seo, cruthaigh cuntas/logáil isteach i do chuntas trí chóras ríomh-earcaíochta ECDC, comhlánaigh gach cuid riachtanach den iarratas agus cuir isteach é. **Ní ghlacann ECDC le hiarratais a chuirtear isteach trí ríomhphost, tríd an bpost ná ar aon mhodh eile.**

Is é an dáta deiridh le hiarratais a chur isteach an dáta a fhógraítear san fhógra folúntais i mBéarla. Moltar duit d'iarratas a chur isteach tamall maith roimh an sprioc-am ar fhaitíos go mbeidh fadhbanna teicniúla agat agus/nó go mbeidh brú ar an suíomh gréasáin. Ní ghlacfaidh ECDC le haon iarratas tar éis an sprioc-ama. Nuair a bheidh d'iarratas curtha isteach agat, gheobhaidh tú teachtaireacht ríomhphoist uathoibríoch lena ndearbhófar go bhfuarthas d'iarratas. Cinntigh go bhfuil an seoladh ríomhphoist a thabharfaidh tú i do chuntas iarratasóra cruinn ceart agus go ndéanfaidh tú do ríomhphost a sheiceáil go rialta.

Tá treoir d'úsáideoirí maidir le ríomhearcaíocht agus treoir maidir le próiseas earcaíochta agus roghnúcháin ECDC le fáil ar ár suíomh gréasáin:

<https://ecdc.europa.eu/en/about-us/work-us/recruitment-process>

Mar gheall ar an líon mór iarratas a fhaightear, ní rachfar i dteagmháil ach le hiarrthóirí a dtabharfar cuireadh chun agallaimh dóibh.

Gheofar an t-aistriúchán⁵ ar an bhfógra folúntais seo i dteangacha uile an Aontais Eorpaigh anseo:

<https://www.ecdc.europa.eu/en/about-ecdc/work-ecdc/recruitment/vacancies/vacancy-translations>

⁵ Cé gur aistríodh an fógra folúntais seo go gach teanga oifigiúil de chuid an Aontais Eorpaigh ón mbunleagan Béarla, is é Béarla gnáth-theanga oibríochtaí na Gníomhaireachta ó lá go lá. Dá bhrí sin, is fearr le ECDC an t-iarratas a fháil i mBéarla.